

Kes pemuda didakwa miliki syabu disebut lanjut 20 Mei

MIRI: Seorang lelaki di-hadapkan ke Mahkamah Sesyen di sini, semalam atas tuduhan memiliki dadah berbahaya jenis syabu.

Ahmad Iman Taufiq Talip, 25, dari Kampung Satap, Bekenu telah didakwa mengikut Seksyen 12 (2) Akta Dadah Berbahaya (ADB) 1952 dan dihukum di bawah Seksyen 12 (3) akta yang sama.

Mengikut kesalahan ini, tertuduh boleh dikenakan denda tidak melebihi RM100,000 atau penjara lima tahun atau kedua-duanya sekali, jika sabit kesalahan.

Berdasarkan pertuduhan kes, tertuduh bukan sebagai seorang yang diberi kuasa di bawah ADB 1952, telah didakwa memiliki dadah berbahaya jenis Methamphetamine (syabu) seberat 0.20 gram.

Methamphetamine merupakan satu item yang terkandung di dalam Bahagian III Jadual Pertama ADB 1952.

Dia didakwa melakukan kesalahan itu pada jam 11.10 malam, 22 April lalu di sebuah sungai di Kampung Hunai, Bekenu.

Walau bagaimanapun, tiada pengakuan salah tertuduh direkodkan.

Terdahulu, pegawai pendakwa ASP Koay Kok Ping memohon ditetapkan satu tarikh baharu untuk sebutan lanjut sementara menunggu laporan kimia berhubung barang kes siap.

Hakim Azreena Aziz membenarkan permohonan itu dan menetapkan 20 Mei depan untuk sebutan lanjut kes di Mahkamah Majistret Batu Niah.

Sementara itu, tertuduh diperintahkan dibebaskan dengan jaminan tunai RM2,000 berserta dua penjamin tempatan sementara menunggu tarikh tersebut.